

CBETA電子佛典集成


CBETA Chinese Electronic Tripitaka Collection
ebook

X69n1366

物初大觀禪師語錄

(門人)德溥 等編校

中華電子佛典協會



目次

- [編輯說明](#)
- [章節目次](#)
 - [物初和尚住臨安府法相禪院語錄](#)
 - [安吉州顯慈禪寺語錄](#)
 - [紹興府象田興教禪院語錄](#)
 - [慶元府智門禪寺語錄](#)
 - [慶元府大慈名山教忠報國禪寺語錄](#)
 - [慶元府阿育王山廣利禪寺語錄](#)
 - [小參](#)
 - [法語](#)
 - [示懋禪人](#)
 - [示小師清正](#)
 - [示勤禪人](#)
 - [頌古](#)
 - [佛祖讚\(偈頌附\)](#)
 - [出山相](#)
 - [補陀大士](#)
 - [馬郎婦](#)
 - [越王感應大士](#)
 - [過水布袋](#)
 - [布袋](#)
 - [維摩](#)
 - [豐干寒拾](#)
 - [寒山掃地](#)
 - [拾得収菜滓](#)
 - [渡蘆達磨](#)
 - [達磨](#)
 - [羅漢](#)
 - [大慧宏智二禪師指讓圖](#)
 - [蓮社圖](#)
 - [遠法師陸脩靜](#)
 - [先師北磻和尚\(教忠仁老請\)](#)
 - [東山源和尚\(樵屋請\)](#)
 - [頑空法師](#)

- [佛日嵩講師](#)
- [寒谷暉法師](#)
- [漢章雲法師](#)
- [雲谷粹長老\(小師請\)](#)
- [芝巖禪師](#)
- [照講師](#)
- [南礪果法師](#)
- [願蒙法師](#)
- [山隱居士\(作圓頂方袍相\)](#)
- [樊路分為母陳安人請贊](#)
- [白贊](#)
- [保福溥長老請贊](#)
- [法喜涇長老請贊](#)
- [集福鑑長老請贊](#)
- [明化惟長老請贊](#)
- [溢首座請贊](#)
- [西山泳長老請贊](#)
- [棲直身長老請贊](#)
- [梨洲戒長老請贊](#)
- [小師清默請贊](#)
- [小師清泰請贊](#)
- [小師清瑞請贊](#)
- [偈頌](#)
 - [壽平章秋壑師相](#)
 - [顯覺心居士轉物軒](#)
 - [人我擔](#)
 - [示錦屏趙高士](#)
 - [性空](#)
 - [絕詮](#)
 - [日本仙侍者歸國](#)
 - [道者復幹接待](#)
 - [日者王振齋](#)
 - [賀大淵自資福住白雲](#)
 - [病中送湛侍者之京](#)
 - [示沙彌](#)
 - [示林侍者](#)
 - [晦機](#)
 - [沙彌付衣](#)

- [吳道人求語回庵](#)
- [小佛事](#)
 - [燈殿主火](#)
 - [心莊主火](#)
 - [書上座火](#)
 - [宗副寺火](#)
 - [恭正二上座入塔](#)
 - [祖剛淨人火](#)
- [卷目次](#)
 - 1.
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 1366
物初和尚語錄

物初和尚住臨安府法相禪院語錄

門人 德溥等 編校

師於淳祐元年七月入院。
指法座。就下平高。難為作者。新法相為汝諸人。別行一路去也。
遂登座。拈香云。此一瓣香。恭為祝延今上皇帝。聖躬。萬歲萬歲
萬萬歲。恭願。金輪統御。十華藏海盡入提封。玉曆長新。五須彌
山高聳壽嶽 次拈香云。奉為 判府安撫大資相公。暨闔郡勳貴。
增崇祿筭 又拈香云。此香爇向爐中。奉為見住淨慈光孝禪寺北磻
大和尚。用酬法乳之恩。就座。(問答不錄)乃云。舞太阿劍。空輪無
跡。奏軒轅樂。不守故常。衲僧家。意不停玄。眼不挂戶。一出一
入。全提半提。此猶是把格則拈弄底。且作麼生是超宗一句。擊拂
子云。梧高鸞鳳棲。海闊蛟龍旋 復舉南泉示眾云。文殊普賢昨夜
三更起來相打。各與二十棒。趁出了也。趙州出問云。和尚棒教誰
喫。泉云。王老師有什麼過。州禮拜。泉便歸方丈。
師云。生風起草。弄點成癡。則不無南泉趙州。即今莫有為眾竭力
底麼。
上堂。真不立妄本空。七凹八凸。四關六通。松聲雜兩山長靜。春
色帶寒花自紅。
上堂。舉齊峯與龐居士同行次。士乃前行一步云。我強如師一步。
峯云。無向背。老翁要爭先在。士云。苦中苦。未是此一句。峯
云。怕翁不甘。士云。若不甘。齊峯堪作什麼。峯云。若有棒在
手。打不解勸。士便打一掌云。不多好。峯始拈棒。被士把住云。
者賊。今日一場敗缺。峯笑云。是我拙。是公巧。士乃撫掌云。平
交平交。
師云。兩箇老翁。分毫子。也不放過。漏綻處。又却不知。好與縛
作一束。送向揚子江裏。

安吉州顯慈禪寺語錄

門人 德溥等 編校

據方丈。拈拄杖云。豎抹橫該。當仁不讓。是汝諸人。何不直下搆
取。卓拄杖云。可惜許。

陞座。祝聖罷。(問答不錄)乃云。明明知有底道不得。鹽落醬裏。明明道得底不知有。蔗咬甜頭。道得道不得。知有不知有。野犴鳴師子吼。且置而勿論。只如道諸佛不出世。祖師不西來。佛法徧天下。談玄口不開。者一堆垃圾。自古自今。費盡手脚。掃除不辦。山僧固是短袖臨筵。初無妙舞。忽有箇漢。出來掀倒禪床。喝散大眾。又作麼生。擊拂子云。黃河三千年一度清。

復舉石樓和尚有僧來參。禮拜起云。未識本來性。請師方便指。樓云。石樓無耳朵。僧云。某甲自知非。樓云。老僧還有過。僧云。和尚過在什麼處。樓云過在汝非處。僧禮拜。樓便打。

師云。埋頭自訴。衡鑑無私。麟膠續絃。須還好手。

因雨上堂。舉鏡清問僧。門外是什麼聲。僧云。檐頭雨滴聲。清云。眾生顛倒。迷己逐物。僧云。某甲只與麼。和尚作麼生。清云。泊不迷己。僧云。泊不迷己。意旨如何。清云。出身猶可易。脫體道應難。

師頌云。滴滴檐前聞不聞。鏡清無舌與誰論。夜來幾陣尤霏霏。欺壓斜陽綠到根。

上堂。空手把鋤頭。男命怕羅睺。步行騎水牛。石虎生肉彪。人從橋上過。橋流水不流。羲和鞭白日。少昊行清秋。傅大士咽喉。被顯慈一掐掐定了也。莫有轉身吐氣底麼。喝一喝。下座。

上堂。覓之不得。不覓奚彰。[翟*支]瞎頂門。焯焯煌煌。桑疇雨過羅紈膩。麥壟風來餅餌香。

上堂。但願空諸所有。慎勿實諸所無。反衣狐裘。倒食甘蔗。龐居士潑策籬。向十字街頭。遼天索價。莫有信受奉行底麼。喝一喝。聖節上堂。拈拄杖云。高而無上。尊而無二。囊括十虛。鼓舞萬有。從教甘露降。醴泉流。芝草生。鳳麟至。便與麼去。堯舜之君。猶有化在。總不與麼。卓拄杖云。五風十雨歲常稔。野外時聞擊壤歌。

上堂。舉東山示眾云。達磨未來時。冬寒夏熱。達磨來後。夜暗晝明。諸人若下得一轉平實語。喫鹽聞鹹。喫醋聞酸。若下不得。迦葉門前底。

師云。五祖師翁己是鉢盂安柄。山僧則不然。達磨未來時。簣桴土鼓。達磨來後。弓影盃虵。下得一轉平實語。未有喫棒分。若下不得。亦未有喫棒分。顯慈既稱東山下兒孫。因甚一倍相反。菡萏香中催夏去。梧桐影裏送秋來。

上堂。舉打地和尚。凡學者扣問。惟打地一下。一日有僧。問其門人云。和尚凡有所問。唯打地一下。意旨如何。門人於竈下。拈一片柴。擲於釜中。

師云。顯慈要問諸人。若道有指示。為甚只打地。若道無指示。為甚却打地。門人恁麼。為當是就裏變通。為當別有道理。若是舉了便會。又爭得。

重九上堂。敗葉零零。唵蛩切切。籬菊粲金英。蟾枝吐金屑。三三如九有譎訛。二九十八無等匹。若也會去。秋空山骨露。若也不會。水落石頭出。

冬至上堂。少室峯前。冰枯雪老。大庾嶺上。日炙風吹。活埋多少英靈。其毒肆行不已。衲僧家。向者裏。展奪馬射胡底作略。從教七十三八十四。陰極於亥。陽生於子。雖然顯慈拄杖子。未肯放過在。何故。黃河九曲。

紹興府象田興教禪院語錄

佛殿。過去已過去。未來猶未來。見在底響。展坐具云。靈山授記。一敗塗地。

陞座。祝聖罷。(問答不錄)乃云。機先有路。休話象耕鳥耘。格外明宗。管甚風飛雷厲。與麼與麼。如來禪祖師禪。太平戰具。拈放一邊。是汝諸人。二六時中。行但行坐但坐。總不得動著一絲毫許。何故。千峯朝華岳。萬派肅滄溟。復舉。茱萸和尚眾立次。萸云。只與麼白立。無箇說處。一場氣悶。有僧擬出問。萸云。為眾竭力。便歸方丈。

拈云。茱萸下者一著。不妨驚羣。其柰未有出身之路。雖然。一因一事。不長一智。

上堂。開口失。閉口喪。脫白露淨。矢在絃上。諸人還見象田麼。良久云。眼睫眉毛都落盡。不知何日又重生。

上堂。十二月十五。石人相耳語。梅開寒谷春。雪滴晴檐雨。太分明。何所覩。南泉不打鹽官鼓。

天基節上堂。不動本位。瑞應人間。冠羣靈而首出。攝大千於毫端。萬彙熙熙兮春臺之樂。萬邦納納兮磐石之安。從教戴天履地。擊壤鼓腹兮。不知天地之寬。且林下衲僧。如何祝聖。倒把一枝無孔笛。等閑吹徹萬年歡。

上堂。若說名身句身。是箇非箇。禪和子如油人麪。似蠅見血。今日總與列下了也。擊拂子云。海水鹹。河水淡。

上堂。舉廓侍者問德山。從上諸聖。向甚麼處去。山云作麼作麼。廓云。勅點飛龍馬。跛鼈出頭來。山休去。至明日。在浴院相見。山撫廓背云。昨日公案作麼生。廓云。者老漢。今日方始瞥地。山又休去。

師云。廓侍者只見錐頭利。不見鑿頭方。諸人要識德山麼。賊是人面。

上堂。佛法無人說。雖慧不能了。老胡三百六十骨節。八萬四千毫竅。等閑披剝將來。未免重重之遶。擊拂子云。紅芳三月春。白雲千嶂曉。

慶元府智門禪寺語錄

門人 德溥等 編校

據方丈。橫按拄杖云。我這裏。不動一機。不撥一境。汝等向甚處相見。靠拄杖云。口上著。

法座。此座高廣。吾不能陞。咄。是甚麼語話。但有路可上。更高人也行。

陞座。祝聖罷。乃云。動止無止。黃河徹底渾。止動無動。白日當空耀。恁麼也得。不恁麼也得。恁麼不恁麼總得。昨日象田長老。今朝白巖主人。息耕休種。減竈添兵。既然定業難逃。豈可循途守轍。然雖如是。畢竟成得箇甚麼邊事。一氣不言含有象。萬靈何處謝無私。

復舉。趙州因僧問。二龍爭珠。誰是得者。州云。老僧只管看。

拈云。趙州老人只解逆風把柁。且不能順水張帆。

故舊相訪上堂。作者相逢。一西一東。斷碑刊白字。當道種青松。

智門鍋子大小。杓柄短長。盡被諸人覷破了也。雖然。三十年後。太公釣魚。

祈雨上堂。毫釐有間。一切言音。盡是佛說。機外無差。一大藏教。盡是魔說。扇子[跳-兆+孛]跳。上三十三天。築著帝釋鼻孔。東海鯉魚打一棒。雨似盆傾。又作麼生。

上堂。三世諸佛不知有。覆水難收。狸奴白牯却知有。頭上安頭。白日西沈。黃河北流。推倒門前案山子。從教坐地看揚州。

上堂。舉世尊陞座。默然而坐。阿難白椎云。請世尊說法。世尊云。會中有二比丘。犯律行。我故不說法。阿難以他心通。觀是比丘。遂擯出。世尊還復默然。阿難又白云。已擯出二比丘。世尊何不說法。世尊云。吾誓不與二乘人說法。

拈云。阿難當時只消向世尊默然處。道箇可惜許。免被他喚作二乘人。

上堂。持杖探水。必知淺深。衡石既懸。必審輕重。衲僧家。出一叢林。入一保社。眼頭生角。囊裏盛錐。以拂子畫一畫云。重關曾巨闢。攜手不同歸。

上堂。舉佛眼在東山師翁會中。充無為軍化士。途中喫攔有省。歸來舉似。後令充知客。因撥火猛省。雖然。每於入室。未能深造。從容請益。東山云。我有箇喻子。如人牽牛。自窗櫺中過。兩角四蹄。一時過了。唯有尾巴過不得。

頌云。一入咸陽盡舊游。春風臺榭對芳洲。非關好景留人醉。自是行人醉不休。

解夏上堂。拈拄杖云。夏終此日。應是九十日內。參得底學得底。是玄路是義路。颺向他方世界。山僧未免作一家宴。以當賞勞。卓拄杖云。勸君更盡一盃酒。西出陽關無故人。

上堂。舉僧問金峯。不落聖凡機。請師別道。峯云。金峯眼不小。僧云。恁麼則一撥良琴。頓清君主去也。峯云。別道又爭得。僧云。為物之言。又作麼生。峯云。頓清君主。僧云。不是金峯也大難。峯云。良籌漢席周苛還輸。僧云。若不承言。恐遭惑亂。峯云。承什麼言。僧云。何勞再舉。峯云。啞子趁船。頑嚚不少。師云。赤鬚鬚。鬚鬚赤。虵吞甕。甕吞虵。及乎點檢將來。二俱不了。當時見他道不是金峯也大難。向他道。別處容闍梨不得。非惟截斷葛藤。且教者僧藏身無路。具眼者辯取。

上堂。言語動用沒交涉。鉢盂羸。饋子細。非言語動用亦沒交涉。主山高。案山低。何以見得。巖莎步入祥麟穩。海樹飛來白鳳閑。

上堂。舉雪峯示眾云。烏石嶺與汝相見了也。望州亭與汝相見了也。僧堂前與汝相見了也。後保福問鵝湖。僧堂前則且致。烏石嶺望州亭甚麼處相見。鵝湖驟步歸方丈。保福便入僧堂。

師頌云。三疊秋風古調清。移商換徵許誰聽。周郎一顧揚鞭去。雲外數峯江上青。

聖節上堂。舉曹山示眾云。虛玄大道。無著真宗。從上先德。推此一位。最妙最玄。要當詳審辯明。君為正位。臣為偏位。臣向君為偏中正。君視臣為正中偏。君臣道合。是兼帶語。

師頌云。天門日射黃金榜。宮殿晴薰赤羽旗。四海九州齊入貢。春風又到萬年枝。

上堂。世尊不說說。正月孟春猶寒。迦葉不聞聞。二月仲春漸暄。者裏會得。只有盲龜之作。驀拈拄杖。畫一畫云。湘潭雲盡莫山出。巴峽雪消春水來。

上堂。舉世尊將諸聖眾。往第六天。說大集經。勅他方此土。人間天上。一切癡惡鬼神。悉皆集會。受佛付囑。擁護正法。設有不赴者。四天門王。飛熱鐵輪。追之令集。既集會已。無有不順佛勅者。各發弘誓。擁護正法。唯有一魔王。謂世尊云。瞿曇我待一切眾生成佛盡。眾生界空。無有眾生名字。我乃發菩提心。

天衣云。臨危不變。真大丈夫。諸仁者。作麼生著得一轉語。為黃面老子出氣。尋常神通妙用。智慧辯才。總用不著。盡闔浮大地。無不愛佛。到者裏。何者是佛。何者是魔。作麼生辯。要識魔麼。開眼見明。要識佛麼。合眼見暗。魔之與佛。以拄杖子。一時穿却鼻孔。妙喜云。幾乎錯喚你作魔王。
師云。是則是。遇大敵勇。要且出不得黃面老子圈績。累他天衣妙喜。費盡分疎。
退院上堂。倒拈折筯攪滄溟。無限魚龍暗裏驚。一笑機關輕捩轉。東湖午夜月華明。

慶元府大慈名山教忠報國禪寺語錄

門人 德溥等 編校

三門。廣大門戶。觸處見成。擬著一毫。鐵山萬仞。諸人還信得及麼。喝一喝。

方丈。拈拄杖云。我若拈起。便向未拈起時作道理。我若不拈起。便向拈起處作主宰。靠拄杖云。劔去久矣。

陞座。拈香祝聖罷。遂就座云。鋒鋌未露。似空藏空。意句纔彰。如水入水。莫有相應底麼。時有僧出問云。金雞唱曉。玉鳳銜花。正與麼時。請師祝聖。師云。祝融峯頂擊金鐘。進云。與麼則一氣不言含有象。萬靈何處謝無私。師云。百花毬上繡紅旗。進云。記得趙州訪大慈。值掃地次。趙州問云。般若以何為體。大慈云。般若以何為體。此意如何。師云。一雙孤鴈撲地高飛。進云。次日趙州掃地次。大慈問云。般若以何為體。趙州放下苕帚。呵呵大笑。又作麼生。師云。兩箇鴛鴦池邊獨立。進云。今日忽有人。問和尚。般若以何為體。畢竟如何答他。師云。三十拄杖。趨下法堂。進云。且道與古人。相去多少。師云。掬水月在手。弄花香滿衣。僧禮拜 師乃云。大機圓應。括地該天。大用全提。海湧山立。從上廣大門風。威德自在。有時拈一莖草。作丈六金身。有時將丈六金身。作一莖草用。主賓互換。縱奪臨時。直得東湖闊處。輓底塵飛。慈雲山頭。翻空浪起。以此助揚聖化。則化無不被。以此仰報親恩。則恩無不酬。正與麼時。如何通信。春行萬國春無跡。月印千江月不分。

復舉首山和尚示眾云。佛法付囑 國王大臣。有力檀越。俾燈燈相續。直至如今。且道。相續箇什麼。良久云。須是迦葉師兄始得。師云。首山老漢。可謂見黍稷而重耒耜。只是向屋裏人分上。分毫子也不得。敢問大眾。相續箇什麼。良久云。南斗七北斗八。

上堂。舉雪竇示眾云。春山疊亂青。春水漾虛碧。寥寥天地間。獨立望何極。遂喚侍者云。適來有人看方丈麼。者云有。竇云。作賊人心虛。

師云。雪竇老人。長因送客處。憶得別家時。

上堂。函蓋合。箭鋒拄。暫時岐路。作家不啐啄。啐啄同時失。唯之與阿。相去幾何。升千仞之上。吾亦與之俱。極九淵之底。吾亦與之俱。驀然青天白日中。下一陣雪。豎毛呵手有分。

上堂。舉僧問保福豁和尚。家貧遭劫時如何。福云。不能盡底去。僧云。為什麼不能盡底去。福云。賊是家親。僧云。既是家親。為什麼。翻成家賊。福云。內既無應。外無能為。僧云。忽然捉敗時如何。福云。內外絕消息。僧云。捉敗後。功歸何所。福云。賞亦不曾聞。僧云。與麼則勞而無功。福云。功則不無。成而不處。僧云。既是功成。為什麼不處。福云。不見道。太平本是將軍致。不許將軍見太平。

師云。若非保福深知賊之情狀。安能勘證如斯分曉。只是下梢。手脚太露。

上堂。終日忙忙。秀支替戾剛。那事無妨。僕谷劬禿當。不動智佛。長時七出八沒。僑梵鉢提。對人倒腹傾腸。拍膝云。疊疊雲山引興長。

上堂。我宗無語句。亦無一法與人。含血喫人。有者便道。桃花浪裏。正好張帆。明月洲頭。更堪垂釣。恁麼見解。未夢見衲僧汗臭氣在。何故。低價難酬。

上堂。古者道。言之者失其真。知之者反其愚。有之者乖其性。無之者傷其軀。慈雲道。礙塞處有通疎。看不足綽有餘。千古華山山下路。輸他潘閭倒騎驢。

天童西巖和尚訃音至。上堂。凌霄跨竈。凌滅吾宗。危分險布。鐵網千重。三更白如晝。掇轉太虛空。幻智庵前覓不得。蕭蕭松竹引清風。

上堂。活句下明得。與佛祖為師。死句下明得。自救不了。慈雲則不然。活句下明得。滴水難消。死句下明得。翻雲覆雨。豎起拂子云。者箇是死句是活句。擊拂子云。生鐵面具。

金文唯翁和尚至。上堂。栢巖那畔。布偃月之陳。雙照明邊。流蠱家之毒。褫剝郎罷。殃害衲僧。今日兵車會同。慈雲請避三舍。何故。兄弟添十字。

解夏上堂。若論此事。如上將軍出師。陷諸死地而後生。今日不問已得未得。已證未證。總被慈雲陷諸死地了也。莫有轉身吐氣底麼。乃云格。

上堂。舉僧問徑山。掩息如灰時如何。山云。猶是時人功幹。僧云。幹後如何。山云。耕人田不種。僧云。畢竟如何。山云。禾熟不臨場後來。應庵和尚云。鳳閣香沈。雪巢夜冷。半窗明月。和氣靄然。正當與麼時。歸宗與徑山。還有相見分也無。見與不見則且止。只如僧問徑山。還具眼麼。其或未然。雲藏無縫襖。鳥宿不萌枝。

師云。澄潭隱隱。不臥蒼龍。應庵老人。為臨濟^烜赫兒孫。因甚隨隊活埋向者裏。慈雲長老跛跛挈挈。且與麼過。何故。伐冰之家。不畜牛羊。

上堂。平常是道。不涉平常。顛來倒去。規圓矩方。林花著雨胭脂落。水荇牽風翠帶長。

淨居和尚至。上堂。峯巒秀異。鶴不停機。靈木迢然。鳳無依倚。直饒與麼。也未為脫灑。今日向真人面前。說不得假。畢竟如何。良久云。青山碾為塵。白日無閑人。

徑山石溪和尚遺書至。上堂。鐵牛昨夜拗折角。自^揚家醜。撞破虛空鳴曝曝。將錯就錯。天台寒拾笑哈哈。利動君子。報道十方無壁落。猶在半途。諸人還見佛海禪師麼。石裂溪空聲愈高。岌岌凌霄頭倒卓。

元宵謝兩序上堂。孤危不立。坐斷千差。有笑陪賓。無賊驗賊。從教一進一退。南來北來。空自合空。水自合水。若是京三汴四。明收暗展。鼓皮打穿。曲子吹徹。慈雲又將何賞功。良久云。漏燈盞。

上堂。取不得舍不得。不可得中只麼得。萬籟收聲兮萬象自閑。秋水吞空兮秋天一色。

上堂。日復日夜復夜。竇八布衫穿。虛空生柄橛。所以道。一剎那際。三世互參。無量劫海。依今而住。拈拄杖云。拄杖子吞却乾坤了也。諸人因甚不知。靠拄杖云。年光隨浪去。臘尾趲春歸。滿散。

天基節上堂。靈山消息綿綿。覺海波瀾浩浩。明今洞古。徹聖該凡。非數量之所能窮。非思議之所能及。正與麼時。又且如何奉重。全提無漏金剛句。山嶽同呼萬歲聲。

上堂。寬廓非外。寂寥非內。拽轉虛空。須彌粉碎。土宿頷下髭鬚長。波斯眼深鼻孔大。擊拂子。下座。

結夏上堂。圓覺伽藍。牛頭北馬頭南。平等性智。七十三八十四。齧定牙關。四稜蹋地。

上堂。久晴還雨。禾山解打鼓。久雨還晴。普化愛搖鈴。錢是足陌。物是定價。趙州直得五年分疎不下。

看經上堂。三百餘會。葛藤露布。以拂子。畫一畫云。多子塔前。水不借路。

上堂。井梧葉葉響颺攪。攪動明河萬里秋。柳[木*栗]摩挲生遠興。白雲流水共悠悠。不是寒山子。誰臨古渡頭。

上堂。一見便見。臨崖潄眼。一得永得。坐井觀天。直饒窺藩不入。據鼎不嘗。也未免落七落八。莫有水不洗水底麼。喝一喝。下座。

上堂。秋光杪暮。霜吹淒肅。無位真人。草眠露宿。慈雲忍俊不禁。試為臨風招之。式微式微。胡不歸。胡不歸。一堂和氣春熙熙。三條椽下堪自怡。東挨西倚終奚為。

上堂。有句無句。如藤倚樹。怒猊抉石。樹倒藤枯。句歸何處。渴驥奔泉。滄山呵呵大笑。面上夾竹桃花。肚裏參天荊棘。

上堂。春風緩春日暖。山鳥啾啾。山花爛熳。達磨面壁九年。歸宗拭壞雙眼。諸人還會麼。南山皁白石爛。

上堂。舉寶應顛和尚。因僧問。從上諸聖。向甚麼處去。應云。不上天堂。即入地獄。僧云。和尚作麼生。應云。還知寶應落處麼。僧擬議。應拈拂子驀口打。又呼令近前云。令合是你行。又打一拂子。

師云。寶應是即是。只是手頭太奢。這僧與其奢也寧儉。擊拂子云。放過不可。

開爐上堂。擁之不聚。撥之不散。聽之不聞。覩之不見。且道。與南方火爐頭話。還有優劣也無。擊拂子云。遇貴則賤。

上堂。曹洞五位。臨濟三玄。總拈向一壁。近日奉化縣裏憨布袋。打失半邊鼻孔。有人向明州城中拾得。還信麼。星河秋一鴈。砧杵夜千家。

上堂。青蘿夤緣。直上寒松之頂。白雲澹佇。出沒太虛之中。住住。萬法本閒。惟人自鬧。削圓方竹杖。鞞却紫茸氈。我愛箇語。具得失兩意。驢揀濕處尿。以拂子。畫一畫云。有時乘好月。獨自過滄洲。

上堂。舉百丈普請鋤地次。有一僧。聞鼓聲。拋下鉏頭。呵呵大笑便歸。丈云。儻哉。此是觀音入理之門。遂喚其僧問云。汝適來見箇什麼道理。僧云。肚飢。聞鼓聲喫飯去。丈乃大笑。

師云吾不如汝。

謝龍首座潯藏主上堂。大藏小藏。全提半提。總是青天撒白雨。引得無限人。踏步向前。不知脚下泥深三尺。慈雲與麼。也是知而故犯。拈拄杖畫一畫云。禹力不到處。河聲流向西。

上堂。親證妙覺。鼠入牛角。西天此土。繼繼承承。直是熾焰難遏。良久云。若教頻下泪。滄海也須乾。

謝監收上堂。隻手擡隻手搦。暗處展明處収。千差一舉。不堪持論。且時節既至。職到威成。又作麼生。飯抄雲子白。瓜嚼水晶寒。

仗錫枯山法兄至。上堂。布二十里雲陳崢嶸。泛九百頃湖光瀲灩。共行官路。各做私商。等是萍實木瓜。誰共區分甘苦。今日兄呼弟應。響順聲和。且道其中事作麼生。擊拂子云。一江分兩浙。三峽透西川。

上堂。舉乳源見仰山。作沙彌時看經。咄云。者沙彌念經。恰似哭。山云。和尚作麼生。源顧視之。山云。若如此何異於哭。師云。迦陵脫殼。其聲已壓凡羽。雖然賴是撞著乳源和尚。徑山偃溪和尚遺書至。上堂。生也如是。白骼樹頭魚扇子。死也如是。泥牛飲乾東澗水。更待說偈。舜若多神三赤喙。討甚巴鼻。醜惡重童無處洗。徑山供盡死欵。慈雲也不相饒。從來生死不同條。上堂。不慕諸聖。不重已靈。囊弓戢矢。坐享太平。德山有棒。正好束之高閣。臨濟有喝。也應無處施呈。慈雲今日。要與諸人。向四稜蹋地處相見。擊拂子云。繅成白雪桑重綠。割盡黃雲稻正青。上堂。僧問。記得五祖和尚問三佛。正與麼時如何。佛鑑云。彩鳳舞丹霄。意作麼生。師云。描不成畫不就。進云。佛眼道。鐵蛇橫古路。響。師云。七花八裂。進云。佛果道。看脚下。又且如何。師云。匙挑不上。乃舉章敬有小師遊方歸。敬問。汝離此間多少時。小師云。自離和尚。將及八載。敬云。辦得箇什麼事。小師於地上。畫一圓相。敬云。只者箇。別更有在。小師畫破圓相。便禮拜。

師云。猛虎不食伏肉。

上堂。舉世尊食時。著衣持鉢。入舍衛大城。乞食於其城中。次第乞已。還至本處。飯食訖。收衣鉢。洗足已。敷座而坐。須菩提云。希有世尊。

師云。釋迦老子。三平二滿。驀被空生一搯。不覺墻倒靠壁。

上堂。(謝監收。兼謝送栢庭塔銘□兄)天何言哉。四時行焉。地何言哉。萬物生焉。衲僧何言哉。一日鉢盂兩度濕。笑看四山青又黃。是則固是。要一轉語上碑去。無有是處。莫有道得底麼。良久云。收。元宵上堂。蓮開陸地。海湧鼇山。不知今夕是何夕。山林城市約同看。豎起拂子云。看看。日月燈明佛。向者裏瑞發本光。晝夜六時。了無間然。擊拂子一下云。眨得眼來。馬後驢前。

上堂。鬧浩浩。靜悄悄。古策風高。玉壺春曉。左顧無瑕。右盼已老。諸人還會也無。擊拂子云。夜來風雨聲。花落知多少。

佛涅槃上堂。三百餘會。盡是死句。娑羅樹間。翻成活句。活中死死中活。水綠山青。天寬地闊。

上堂。舉趙州訪茱萸。將拄杖於法堂上。從東過西。從西過東。萸云。作什麼。州云探水。萸云。我者裏一滴也無。探箇什麼。趙州靠拄杖便出。

師云。茱萸雖善關防。爭柰賊無空手。且道。趙州以拄杖靠壁而出。意作麼生。

謝法眷上堂。癡癡兀兀。乖乖厓厓。水乳和同。肝膽楚越。何以見得。共倚闌干舒笑眼。四山松桂動秋風。

赴育王辭眾。上堂。片段悠揚點太空。卷舒無地覓行蹤。業風有意相交輓。又復從龍過別峯。

慶元府阿育王山廣利禪寺語錄

門人 德溥等 編校

師景定四年。十一月十日。入寺。

指三門。擬即差。動即隔。已 是撥動關棧子了也。顧左右云。莫有同出同入底麼。喝一喝。

方丈。拈拄杖云。者裏無汝入作處。大慧佛照二祖。費盡手脚。諸人又只管眼瞠瞠地。以拄杖畫一畫云。觸體徧野。

勅黃。杲日麗天。清風匝地。闔闔羣機。鼓舞萬彙。且其中消息。如何傳宣。度與維那云。黃是紙。黑是字。

法座。借功明位。借位明功。古人向者裏。納敗不少。鄮峯駟不及舌。以楔出楔。

陞座拈香云。此一瓣香。恭為祝延今上皇帝。聖躬。萬歲萬歲。萬萬歲。陛下恭願。須彌八萬四千由旬。即壽山之崇峻。華藏一十三重世界。統皇業之提封。

次拈香云。此一瓣香。奉為 太傅大丞相樞使國公。闔朝文武百寮。資陪祿筭。又拈香云。此香別無奇特。却不雷同。供養前住臨安府淨慈光孝禪寺。先師北磻大和尚。用酬法乳之恩。

斂衣就座。乃云。言前薦得。滯殼迷封。語下精通。膠柱鼓瑟。去此二途。如何相見。僧出問云。一封 詔出 禁庭中。催起慈峯住鄮峯。今日開堂宣妙法。祥雲瑞氣罩虛空。正與麼時。願聞法要。師云。金香爐下鐵崑崙。進云。祝 聖已蒙師指示。向上宗乘事若何。師云。雞知將旦。鶴知夜半。進云。昔日閩王。請羅山開堂。山陞座。以手斂僧伽梨。左右顧視。便下座。此意如何。師云。鐵旗鐵鼓。進云。閩王執羅山手云。靈山一會。何異今日。又作麼生。師云。徧地春風布蒺藜。進云。羅山道。將謂大王是箇俗人。響。師云。喫拳還有報拳時。進云。只如禪師。今日開堂。四眾臨筵。有何指示。師云。三汲浪高魚化龍。癡人猶辱夜塘

水 乃云。正覺山前。雲生膚寸。少林那畔。陽焰翻波。自此列派分枝。千重百匝。多處添少處減。江南有江北無。看來也是手掩黃河曲。如今更教新育王如何施展。事不獲已。和底一時翻却。且圖各自知慚。葉脫止啼之金。國無定亂之劍。謳歌鼓腹。共樂昇平。畢竟以何為據。青青趙老庭前栢。髣髴南山石上松。

復舉。僧問六祖。黃梅意旨。什麼人得。祖云。會佛法人得。僧云。和尚還得否。祖云。我不得。僧云。和尚為什麼不得。祖云。我不會佛法。

師云。醜醜毒藥。覆雨翻雲。未為分外。諸人要見六祖大師麼。貧是富媒。

當晚小參。無入作處。輕帆得便風。線路纔通。乞兒見小利。便與麼寸長尺短。不與麼尺短寸長。如今捩轉話頭。又且如何啗啄。六殊勝八吉祥。徧地蒺藜。參天荆棘。德山臨濟沒齒穿齧。雲門趙州握拳透爪。彼彼互顯。各不相知。育王今夜。別借一路。與汝諸人。相見去也。拈拄杖卓一下云。淺水無魚。徒勞下釣。復舉德山示眾云。今夜小參不答話。問話者三十棒。時有僧出。德山便打。僧云。某甲話也未問。因甚便打。某甲。山云。汝是甚處人。僧云。新羅人。山云。未跨船舷。好與三十棒。

師云德山布縵天網。者僧暗躍龍門。雖然與麼。得不償勞。留兩序上堂。拈拄杖云。七手八脚。三頭兩面。有處收攝。無處展演。或時坐斷要津。或時隨機舒卷。總不與麼時。如何與諸人相見。靠拄杖云。不得動著。動著則打折你驢腰。

入城參州回上堂。暗瓦霜凝寒客夢。晴牕日透借朝溫。不能緘口圍爐坐。斂袂空趨畫戟門。堪悲堪笑不動尊。天津橋看弄胡孫。此意與誰論。長者子無裊。

上堂。拈拄杖云。從普賢門入者。墻壁瓦礫。為汝發機。從觀音門入者。蝦蟇蚯蚓。為汝發機。且道。從虛空入者。又教誰發機。卓拄杖一下云。鶴飛千仞雪。龍起一潭冰。

等慈西堂至上堂。拈拄杖云。作而無作。龍驤鳳躍。無作而作。雷藏電收。滴水漲滄溟之勢。鳩毒行平等之慈。此猶是尋常用過底。今日相見。又作麼生。靠拄杖云。放過一著。全主全賓。

徑山淮海和尚訃音至。上堂。淮雲慘淡。淮水枯竭。徑山老子無言說。喝得巖厓成百裂。末後全提太親切。笑不徹哭不徹。憍梵鉢提驚吐舌。

解夏上堂。眾毛成毬。眾水成流。眾人成市。眾土成丘。育王聚眾作夏。成得箇什麼。良久云。今夏東州。明夏西州。

上堂。舉丹霞一日訪南陽國師。值國師睡次。乃問侍者云。國師在麼。者云。在即在。只是不見客。霞云。太深遠生。者云。非但上

座。佛眼也覷不見。霞云。龍生龍子。鳳生鳳兒。便出去。國師睡起。侍者舉前話。國師打二十棒趨出。丹霞聞得乃云。不謬為南陽國師。

師云。侍者當面著賊。且道。那裏是他著賊處。若也知得。國師令不虛行。

上堂。舉僧問馬祖。離四句絕百非。請師直指西來意。祖云。我今日頭痛。不能為汝說得。問取智藏去。僧問藏。藏云。我今日勞倦。不能為汝說。問取海兄去。僧問海。海云。我到者裏却不會。僧回舉似馬祖。祖云。藏頭白海頭黑。

師云。海枯終見底。人死不知心。

上堂。僧問鸞啼綠柳。蝶舞芳叢。景物催人。請師提掇。師云。[翟*爻]瞎眼睛。進云。爭柰嶺頭布穀催耕急。花下提壺勸飲忙。師云。撞破髑髏。僧云。記得。僧問百丈。抱璞投師。請師一決。丈云。昨夜南山虎齧大蟲。此意如何。師云。真不掩偽。進云。不謬真詮。為甚不垂方便。丈云。掩耳偷鈴漢。又作麼生。師云。醉後添盃。進云。不得中郎鑑。還同野舍薪。丈便打。且道者僧過在甚處。師云。得人一牛。還人一馬。僧禮拜。乃云。三到投子。九上洞山。祥金應不躍冶。萬機休罷。千聖不携。猶欠買草鞋在。擔版漢見一邊。拽不退後。推不進前。波斯失却招文袋。月裏姮娥笑揭天。

上堂。舉馬祖陞堂。眾方集。百丈出卷席。祖便下座。歸方丈。却問丈云。我適來上堂。未曾說話。你因甚麼便卷却席。丈云。某甲昨日。被和尚扭得。鼻頭痛。祖云。你昨日向甚處留心。丈云。今日鼻頭又不痛也。祖云。你深得今日事。

師云。父慈子孝。小黠大癡。若據令而行。纔見卷席。便與擯出。何故。透過龍門。風波更險。

壽崇節上堂。不違本願。示同釋尊之生。密運真慈。量等摩耶之廣。母儀一聖。子育萬邦。其尊無二。其德難量。林間衲子伸三祝。指出須彌作壽香。

乾會節上堂。聖諦第一義。智而叵窮。深而叵測。諸佛演之而不盡。眾生由之而不知。驀拈拄杖云。拄杖子。久默斯要。不務速說。以拄杖卓一下云。四月初九。乾會節。

結夏上堂。紅塵紫陌。圓覺伽藍。蹊田奪牛。平等性智。金不博金。水不洗水。德山因甚。卓牌鬧市。

上堂。(謝秉拂幹齋)教中道。於食等者。於法亦等。審如是也。都寺營齋。首座秉拂。施者受者。說者聽者。等無有異。食即色香味觸法。離見聞覺知。且如何說箇等底道理。擊拂子云。前者唱于。後者唱喁。

上堂。舉龐居士問馬祖。不昧本來人。請師高著眼。祖直下覷。士云。一種沒絃琴。惟師彈得妙。祖直上覷。士作禮。祖便歸方丈。士隨後入云。弄巧成拙。

師云。高者下之。窪者隆之。挨肩不同步。携手隔雲泥。

上堂。聖人無己。靡所不已。虎齧大蟲。虵吞鼈鼻。老僧實語告人。直待虛空落地。

禱雨上堂。有一句子到你。陽焰救渴。無一句子到你。水出高原。覷著四角六張。動著七凹八凸。善觀風雲別氣候底便道。逢庚則變。要且事無一向。擊拂子云。菩薩龍王行雨潤。遮身向上數重雲。

解夏上堂。萬里無寸草。脚跟不點地。出門便是草。騎鶴上揚州。敢問諸人。作麼生行履。擊拂子云。點鐵化為金石易。勸人除却是非難。

上堂。舉龐居士。一日雪中擲倒。女子靈照去身邊臥。士云。作什麼。照云。見爺倒地。特來扶起。士便起去。

師云。巨姦易折。家賊難防。

上堂。未曾親近。早隔大千。因風吹火。纔有所重。便成窠臼。順水流舟。趙州使得十二時。永明日為百八事。國清才子貴。家富小兒嬌。鄮峯敢問諸人。今何所務。擊拂子云。除非自解倒騎驢。一生不著隨人後。

上堂。霜風未老。愛景如春。空洞絕朕。彌滿刹塵。今日明日瞥喜瞥嗔。暗把風流賣與人。

重陽上堂。舉真淨和尚示眾云。九日無白醪。飽餐黃栗糕。十日有黃菊。催人打禾穀。五更鐘未鳴。鄰雞已數聲。相逢不下馬。各自奔前程。

師云。真淨老人。貴買賤賣。鄮峯則不然。九日無白醪。紫萸烹茗好。今古說登高。誰踏古皇道。落葉鼓真風。黃菊說玄要。自笑太無端。相牽入荒草。

上堂。舉百丈再參馬祖。侍立次。祖以目顧禪床角拂子。丈云。即此用離此用。祖云。你他後開兩片皮。將何為人。丈取拂子豎起。祖云。即此用離此用。丈挂拂子於舊處。祖便震威一喝。百丈直得三日耳聾。

師云。琴工不入滄海。不能移其情。鷓鴣不馭扶搖。不能變其形。然則向上一路。啐啄猶乖。諸人要會三日耳聾麼。百鍊龍泉。躍入大淵。

上堂。春雨如膏。春雲如鶴。春草離離。春花灼灼。騎聲蓋色兮何太乖張。毫忽不形兮填溝塞壑。直往無前。猶欠一著。

壽崇節上堂。慈深願廣育 聖明。首出萬國之儀刑。壽崇功德無能名。妙高山色青又青。

乾會節上堂。大統綱宗句。輪王髻中珠。提持不到。意向不及。正當乾會九五。驀拈拄杖云。拄杖子。向者裏赤心片片去也。卓拄杖一下云。妙德尊寰宇。高明揭太虛。

結夏上堂。禁足護生。繼韓盧而責獲。克期取證。絆騏驎而使馳。若是迷風耀日。背負須彌底。又且如何。鄮峯縵天網子。也要你透在。

上堂。舉李翱刺史問僧。馬祖有何言句。僧云。說即心即佛。又說。非心非佛。史云。總過一邊著。刺史又問西堂藏和尚。藏召云。刺史刺史。史應喏。藏云。鼓角動也。師云。夔憐蚊。蚊憐虵。總被者僧暗裏覷破。

上堂。舉大珠海禪師。有座主來參。問云。座主講什麼經。主云。三昧經。珠提起拄杖云。者箇是何三昧。座主罔措。珠云。老僧住持事繁。不能打得你。

師云。當時見他提起拄杖。云者箇是何三昧。向他道。早箇呈似和尚了也。

中夏上堂。拈拄杖云。前四十五日已去。紅霞穿碧落。後四十五日未至。白日繞須彌。正當今日。上無衝天之計。下無入地之謀。卓一下云。將軍射中南山虎。元是藍田老石頭。

上堂。舉僧問趙州。二龍爭珠。誰是得者。州云。老僧只管看。師云。者僧發此一問。大似向致仕。宰相面前。說少年登科事。一般。只如道老僧只管看。又作麼生。雖無上馬力。猶有殺人心。

上堂。拈拄杖云。行不到處行一步。甜瓜徹蒂甜。說不到處說一句。苦瓠連根苦。掃盡從前閑佛祖。發機須是千鈞弩。擲拄杖下座。

佛成道上堂。拈拄杖云。大眾。黃面老漢雪山六年。受盡凍餓。將謂成得箇什麼。元來是眼裏著沙不得。便乃指空話空。拏空塞空。卓拄杖云。千古萬古成狼藉。帶雨梅開濕曉風。

應真宗師至上堂。律非縛。禪非脫。蝴蝶夢莊周。周公制禮樂。會則事同一家。不會則萬別千差。還會麼。一片白雲生嶺上。幾回開了又還遮。

上堂。春色融融。花氣濛濛。六牕俱不鑰。當處不留蹤。危欄同徧倚。身在寂寥中。幾欲全提先漏洩。滑唇黃鳥弄春風。

上堂。諸法從本來。常自寂滅相。玉兔西沈。金烏東上便與麼去。坐殺闍梨。不與麼去。走殺上座。拈拄杖畫一畫云。石牛攔古路。一馬生三寅。

佛涅槃上堂。簸土揚塵。金剛正體。七顛八倒。大寂定門。擊拂子云。排空煙嶂添愁色。著雨林花帶淚痕。

法喜長老至。上堂。向上一路。啐啄猶乖。水乳和同。肝膽楚越。南嶽問馬師作麼生。巴陵呈雲門三轉語。意在於何。遺腹之子。無貌於心。

上堂。見見之時。雨洗淡紅桃萼嫩。見非是見。風搖淺碧柳絲輕。見猶離見。白雲影裏怪石露。見莫能及。流水光中古木清。莫有知時識節底麼。喝一喝。

北磻和尚忌日。拈香云。監本倔強。匙挑不上。罽空雲蒂補虛空。陸地滔天翻白浪。暗中拈出定命竿。鶻眼鷹睛迷向當。老和尚。為誰沒齒更穿齧。從教疑殺天下人。

垂寂前六日。上堂。拈拄杖卓一下云。尋牛須見跡。諸人喫粥喫飯處。折旋俯仰處。還見跡麼。跡在牛還在。還見牛麼。直饒露迥迥地。趁亦不去。工夫純熟。皓素希奇。放行把住。復由誰。嗚咿嗚咿。擲下拄杖云。人牛俱不見。正是月明時。

小參

結夏。西天此土。多少英靈。總被二千年前。一則閒公案礙塞。直是做一動子不得。眼生三角。頭峭五嶽。矢在弦上。不得不發。圓覺伽藍。入此寨破此寨。平等性智。驢耳長馬耳短。四稜蹋地。臭肉來蠅。又誰管你。鉢盂峯雲合雲開。東錢湖水深水淺。山僧與麼告報。莫有橫點頭底麼。驀拈拄杖。卓一下云。先鋒有作。殿後無功。復舉。仰山在瀉山。坡下牧牛。見一僧上山。未久即下。仰山問云。上座何不且住。有甚因緣不契。僧云。和尚問我名什麼。我答云歸真。和尚云。真歸何處。我答不得。仰云。汝更去。和尚若問你。真歸何處。但道。眼裏耳裏鼻裏。者僧如所教。山云。脫空謾語漢。此是五百人善知識語。

師云。明中賣弄。暗裏脫空。若是者僧。春風得意馬蹄疾。一日看盡長安花。

解夏。啐啄不得。常自現前。擬欲完全。翻成兩片。點著便行底。撞頭磕額。死在平地上。八面玲瓏。一念萬年。萬年一念。更說甚四月十五日結。井底蝦蟆吞却月。七月十五日解。婁至拳頭如鉢大。冷笑韶陽老古錐。利刀剪却令人愛。直饒與麼。是汝諸人。還免得索飯錢麼。擊拂子云。池菡墜紅遮玉鏡。井梧翻碧點銀床。復舉。僧問曹山。與麼熱。向甚處回避。山云。向鑊湯爐炭裏回避。僧云。只如鑊湯爐炭裏。如何回避。山云。眾苦不能到。

師云。荊棘鋒刃叢。洞房絲竹裏。威鳳何須住碧梧。臥龍終不鑑止水。

結夏。如來有密語。金生麗水。迦葉不覆藏。玉出昆岡。向之則勝虵繞足。背之則彩鳳冲霄。不向不背。揚塵播土。地闊天寬。長期短期。總是按圖索馬。慈峯到者裏。只得撮鹽在。火事出急家。擊拂子云。笑我者多。哂我者少。復舉。大慈掃地次。趙州問云。般若以何為體。慈云。般若以何為體。州呵呵大笑。明日趙州掃地次。大慈問云。般若以何為體。州放下茗帚。呵呵大笑。便歸方丈。

師云。大慈譎而不正。趙州正而不譎。若是般若體。未夢見在。解夏。長期百二十日。日日是好日。竺乾震旦。無限英靈。一等遵承佛勅。於其中間。各有所修。各有所證。惟我明州管下。慈雲山中。禪和子。一箇箇鼻孔遼天。眼不掛戶。意不停玄。吸湖光嚼山翠。七出八沒。東倒西播。輾到今日也不妨自在快活。山僧亦不柰他何。雖然甜瓜徹蒂甜。苦瓠連根苦。復舉乾峯示眾云。舉一不得舉二。放過一著。落在第二。雲門出眾云。昨日有人。從天台來。却往徑山去。峯云。明日不得普請。

師云。或者道。五更侵早起。更有夜行人。是則是。只如乾峯道。明日不得普請。又作麼生。大動不樹賞。

冬至。衣穿肘露。火冷雲深。便與麼去。鈍置殺人。放一線開。別有通變。乾三連坤六斷。南斗七北斗八。橫拋豎擲。逆行順行。直饒鶻眼鷹睛。一家不知一家事。鄮峯今夜。抑下威光。與諸人相見去也。擊拂子云。冬至寒食一百五。二十四番花信風。復舉。麻谷問臨濟。大悲千手眼。阿那箇是正眼。濟云。大悲千手眼。阿那箇是正眼。速道速道。谷據坐禪床。濟問訊云。不審。谷擬議。濟拽谷下禪床。却坐。谷便出去。

師云。非麻谷不足發臨濟之膏肓。非臨濟不能瞰麻谷之敗缺。若是正眼。那裏泊在。

持鉢抵嘉禾報恩。眾請小參。嘉禾勝地。祐陵道場。溢目風光。鴉飛不度。丈室內雨華徧地。冰谷發和氣。春風賣弄。正法眼破砂盆。誰敢正眼覷著。老倒持盂。越界侵疆。故然客聽主裁。驀拈拄杖云。爭奈隨行拄杖子。枝痒[跳-兆+孛]跳。卓一下云。嶺梅殘雪後。雲鬢未梳時。

復舉玄沙問鏡清。不見一法。是大過患。汝道不見什麼法。清指露柱云。莫是不見者箇法麼。沙云。浙中清水白米。從汝喫。佛法未夢見在。

師云是則是。的立矢集。力敵勢均。亦未免因齋慶贊。玉几與光孝。如何相見。喝一喝。下座。

承天眾請小參。雙峩峩。聳來者斫額無門。碧玉盤。空應物元無方所。賓順主睦。函蓋相應。泥牛吼月。木馬嘶風。屈摺修羅舞柘枝。舜若多神添笑靨。是即是了也。忽若拈出三玄戈甲。立定五位君臣。又作麼生抵擬。擊拂子云。猶握金鞭問歸客。夜深誰共御街行。

復舉 憲宗朝。宣鵝湖大義禪師入內。有法師問云。欲界無禪。禪居色界。此土憑何而立名禪。義云。法師只知欲界無禪。不知禪界無欲。法師問云。如何是禪。鵝湖拈起拂子。空中點一點。法師罔措 憲宗云。法師講無限經論。只者一點。便不柰何。

師云。持圓逗方。持方逗圓。一得一失。天鑑昭然。

思溪圓覺眾請小參。老倒放憨。贏得日求升合。一條官路。謾將車子橫推。幾處持方逗圓。有時遇貴則賤。經思溪鎮。過石林關。水洩不通處。東閣大開。退已讓人時。就窠打劫。大徹投機之後。三代禮樂猶存。者裏客聽主裁。如何與大眾相見。擊拂子云。快便難逢。

復舉。臨濟訪龍光。便云。不展機鋒。如何得勝。光據坐。濟云。大善知識。豈無方便。光瞪目云。噯。臨濟拍手云。者老漢。今日敗缺。

師云。油幢宴坐。勅敵何來。刁斗分明。交綏而退。諸人還見二老麼。

法語

示懋禪人

從上佛祖。了無一法與人。只貴當人。退步就己。捱到無用心處。等閒[祝/土]著撞著。如怒猊抉石。毒龍攪海。方知佛祖。無一法與人。往往今時兄弟。不患資之不敏。而患不能鈍其敏。怕人道不會。便只守目前光境。狂機惡覺。如蜚螻之抱糞丸。自以為得。不知真箇得底。不如是也。若是真正道流。具不肯佛祖底氣槩。莫道今時途轍。便是虛空也須捩轉。七縱八橫。大用將去。方可為出羣種草。無忝矣。

懋禪人資性穎利。向此著到。來慈雲三年。秋風引興。振徧參之錫。以求警策。老拙無可道。寶祐洵九。前一日書。

示小師清正

行脚得力句。未有佛祖時體取。早落第二。若是出一叢林。入一保社。輾纏萬戶葛藤。討甚分曉。須知正因穎利之士。如迦陵脫殼。已壓凡羽。借使未得因地一下。其堅確志趣。自是不同。雪峯三到投子。九上洞山。將手巾一條。挂在項上。是處做飯頭。執勞不憚。觀其初見德山。問宗乘中事。學人還有分也無。山和聲便打。更與他說箇我宗無語句。亦無一法與人。郎當不少。雪峯當下如桶底脫。爭柰宗乘中事何。直至鰲山。雪夜向巖頭一一供款。驀被震威一喝云。從門入者不是家珍。則平昔所重處。一時不見了。連忙叫道。今日始是鰲山成道。又是誰使之然耶。清正曩出蜀。而僧於此。蓋夙緣也。一單下版。頗卓卓地。較諸前時。則究宗趣識語脉。斯二者皆病也。予見今時究宗趣者。多作實法商量。識機語者。蹈人腳跡。既不作實法商量。又不許蹈人腳跡。當作如何倒斷。待汝徧參歸來。別有勘處。

示勤禪人

牧而致於懶。則不知其孰為人。孰為牛也。回視昔時。入草拽回。徒自扭捏。而尺筐寸繩。亦為長物。既到此矣。又轉向那邊行履。則垂手之事。但有相逢者。皆穿其鼻焉。直須實到此田地始得。江右勤禪人。學牧者也。嘗墮慈雲一單之數。茲來自玉几訪別出示諸老所貽語。乃知勤以懶牧稱。因語之曰。牧者自牧也。不牧則已。牧必至於懶。方有休歇之場。叢林期望爾者。在此耳。雖然予猶有問焉。昔懶宗懶於他。而勤於牧所以道。露迥迥地。可憐生。趣亦不去。是終老不牧而牧也。勤若勤於他。而懶於牧。則蹊田矣。若懶於他。又懶於牧。且莫說夢。便向者裏。實觀日看。驀然不見人牛。則歸家穩坐。真成懶牧矣。

頌古

舉百丈惟政禪師。示眾云。汝等與我開田。我與汝說大義。僧云。開田了也。請和尚說大義。丈行數步。展兩手。乾坤雖有作。太平本無象。赫日正中天。去却脩羅掌。舉麻谷問僧。甚處來。僧近前云。不審。谷再問。僧退後云。珍重。谷近前搗住云。這箇師僧。問著便作佛法祇對。僧云。大似無眼。谷放手云。放汝命通汝氣。僧作禮。谷又搗住。僧掣肘而去。谷云。休將三歲竹。擬比萬年松。自是兵家貴伐謀。鑿鋒擒敵未為優。沈沈刁斗三更月。玉帳威行紫塞秋。

舉殃崛摩羅救產難公案。
忽看龍舟壓浪飛。鼓聲催促笛聲悲。錦標到手還輕放。轉得頭來事已非。

舉臨濟中夏歸省。黃檗值看經次。濟云。我將謂是箇人。元來是箇淹黑豆老和尚。住數日。辭去。檗云。你破夏來。何不終夏了去。濟云。暫來禮拜和尚。檗便打。令去。臨濟至中路。疑此事。却回終夏。

故園紅紫自芳菲。不在春風著意吹。待得征人重回首。枝頭香雪已紛披。

舉古德莊上喫油糍公案。
纔是貪他便著他。其間半露又全遮。只今誰是傍觀者。一笑何勞掛齒牙。

舉瀉山示眾云。仲冬嚴寒年年事。晷運推移事若何。仰山叉手進前而立。瀉云。我情知你答者話不得。顧謂香嚴云。你又作麼生。嚴云。某甲偏答得者話。瀉理前話。嚴亦叉手進前而立。瀉云。賴遇寂子不會。

吹無孔笛。和氈拍版。父子和同。冰炭相反。末上之機果若何。定州元出花瓷盃。

舉鏡清問僧。甚處來。僧云。三峯。清云。夏在甚處。僧云。五峯。清云。放汝三十棒。僧云。某甲過在甚處。清云。為你出一叢林。入一叢林。

一鼓薰風至自南。再行璧月掛蒼杉。錦筵公子方沈醉。白雪幽蘭空再三。

舉僧問洛浦。撥亂乾坤底人。師還接否。浦豎起拂子。僧云。與麼則得遇明君去也。浦云。依稀似曲纔堪聽。又被風吹別調中。咄哉古墓一狐精。化作人來要弄人。華表未然先敗也。至今無地可容身。

舉雪峯一日普請次。自負一束藤。路逢一僧。便拋下。僧擬取。峯與一踏。遂歸舉似長生云。我今日踏得者僧快。生云。和尚替者僧。入涅槃堂。始得。峯休去。

休論鳳箭射烏巢。看取虛弓落九包。收放若為逃羿手。控弦傍助亦徒勞。

舉趙州問投子。大死底人。却活時如何。子云。不許夜行。投明須到。

兩聲不合共交肩。毒手纔施報老拳。今日上天同碧落。明朝入地共黃泉。

舉僧問洞山。寒暑到來。如何回避。山云。何不向無寒暑處去。僧云。如何是。無寒暑處。山云。寒時寒煞闍梨。熱時熱煞闍

梨。

客泛靈槎犯斗牛。銀河碧海暗通流。昆侖推倒無依倚。萬里長空一樣秋。

舉巖頭問僧。甚處來。僧云。西京來。頭云。黃巢過後。還收得劍麼。僧云。收得。頭引頸云。因。僧云。師頭落也。頭呵呵大笑。僧後到雪峯。峯問云。甚處來。僧云巖頭來。峯云。有何言句。僧舉前話。峯打二十棒趲出。

賈勇揚旌無大敵。看看身已陷重圍。要令奪角衝關去。駕與青龍不解騎。

舉仰山因僧來辭。山以手畫一畫。僧不去。仰山又畫一畫。僧便去。大愚芝和尚云。前一畫。為什麼不去。後一畫。為什麼却去。要會麼。前一畫後一畫總成兩畫。

飢人貪食良農粟。渴漢錯飲蠱家水。對面還成千里遙。賊人有智過君子。

舉。吾不見時。何不見吾不見之處。若見不見。自然非彼不見之相。若不見吾不見之地。自然非物。云何非汝。

張公屋畔盡桑麻。李老園中只種花。滿目風光無限好。笑呼銀盃酌流霞。

舉乾峯示眾云。法身有三種病。二種光。須是一一透得。始解穩坐。時雲門出眾云。庵內人。為什麼。不見庵外事。乾峯呵呵大笑。門云。猶是學人疑處。峯云。子是什麼心行。門云。也要和尚委悉。峯云。始解穩坐。

江面無風平似鏡。轉頭變態互呈新。馮夷駕浪險難涉。漁父操舟妙若神。

舉罽賓國王。秉劍問二十四祖師子尊者曰。師得蘊空否。祖云。已得蘊空。王曰。離生死否。祖云。已離生死。王曰。既離生死。可施我頭。祖云。身非我有。豈況於頭。王遂斬之。白乳湧高數丈。王臂自墮。

玄沙云。大小師子尊者。頭也不能作主。雪竇云。作家君王。天然有在。

葉脫風高天地秋。長江袞袞只東流。行人不折離亭柳。羌笛空吹落日愁。

舉巖上座到百丈。丈云。有事相借問。得麼。巖云。幸自非言。何須諮[言*窒]。恁麼則許借問也。巖云。更請一甌茶。丈云。收得安南。又憂塞北。巖擘開筈云。與麼與麼。丈云。要且難搆。要且難搆。巖云。知即得知即得。

善戰何如善用謀。孫吳兵法豈同儔。秋風古塞看形勢。一樣邊聲兩樣愁。

佛祖讚(偈頌附)

出山相

入山去龍章鳳質。出山來敗衣敦率。更將悟底分疎。添得一場[泳-永+盾]渥。

補陀大士

海天寥沈。海岸孤絕。見得親切。虛空釘橛。怒濤舂碎巖前月。

馬郎婦

倩盼動嬋娟。常持六萬言。金沙灘上月。五欲浪中翻。

越王感應大士

海山嶄絕。海濤舂撞。海風披拂。海雲飄揚。仰慧日之破暗兮誰其迷照。觀普門之不鑰兮去不至方。感應道交。叵測叵量。越國投誠。菩提影現。我作是說。增金以黃。

過水布袋

深則厲。淺則揭。七十二汀。無風浪起。

布袋

兜率陀天。長汀管界。潑布袋打開。自買還自賣。眨上眉毛。敗也敗也。

維摩

環堵室。十笏地。咄哉維摩。病在者裏。

豐干寒拾

來何處。去何之。與二子。何所期。虎視眈眈。陰飈淒淒。

寒山掃地

橫也掃。豎也掃。七佛之師。狼藉不少。

拾得収菜滓

一機不副。截斷千差。瓶瀉妙答。綴齒粘牙。何如在國清寺裏。偷佛飯食菜滓。

渡蘆達磨

南頭問。不善答。北頭去。不相合。自謂踏得著。全然沒交涉。無枝葉處。枝葉縱橫。無風波處。風波匝匝。

達磨

一花移自西。五葉香燦爛。嗅藥與尋芳。紛如蜂蝶亂。地闊天寬。難圖滋蔓。

羅漢

藕竅藏身。不形一縷。掀播風雲。澤徧大地。彼其隱現大小之不同。終莫能逃乎應量之器。明眼人前。可賤可貴。咄。

大慧宏智二禪師揖讓圖

載色載笑。和氣津津。半前落後。超軼絕塵。瘴面忽澤兮疾雷將奮。犀顛茁霜兮枯木生春。腹背受敵。百萬買鄰。相見易得好。共事難為人。

蓮社圖

天運悠悠終典午。競從廬阜尋歸處。鑿池種藕擬奚為。西山幾度看懸鼓。愛酒淵明挽不來。貪佛靈運推不去。同盟二九姑置之。咄爾而今在何許。

遠法師陸脩靜

一笑相逢。悠然意消。植藩籬兮肝膽楚越。外形骸兮鵬鷗逍遙。涼襟灑灑兮何須鶴馭之風。別袖翩翩兮不見虎溪之橋。此東林六事之一兮。猶可想見其丰標。古不可挽。今不可招。火生蓮花。雪長芭蕉。

先師北磻和尚(教忠仁老請)

咄咄咄。何人斯。赤脚繞。徧須彌。不成伎倆。客來看賊來打。又待臨時眼睛定動。伏惟伏惟。教忠曾被其毒。未知東門之役。何以報之。

東山源和尚(樵屋請)

門裏蟲蠱裏毒。纔過凌霄峯渾家成不睦。指白為黑兮質證有頭之冤。改調移聲兮唱出無譜之曲。自奉川之富沙以至乎劒池深處兮有誰共躅。何須象骨巖高。須知已展不縮。韶成九包至。樵唱一夔足。家私莫隱。全封半幅。贊之罵之。口啞舌禿。

頑空法師

眼頭生角。囊裏盛錐。駕古軌轍。闢坦路達。龍藏忘筌兮揭義天之寥豁。塵尾倒握兮翻辯瀾之渺瀾。堂堂之陳。正正之旗。非其所是。是其所非。發老嘯之韜略。茂老豁之孫枝。迨其涅槃後有。借萬象舌兮其誰知之。

佛日嵩講師

宗圓融具德之宗。而執其要領。傳無得明道之傳。而大其家聲。肅四三昧兮謹一躬之踐履。枳四法界兮悅九重之皇情。掃蜂房蟻垤。成大方之家。羅僧鳳義虎。為扶宗之英。奎璧其文兮般若愈明。金襴其衣兮法道愈榮。若夫龍勝聯宗帝心別弘。當說而冥當默而明。則所謂百川匯流。而朝宗滄溟者也。

寒谷暉法師

祖庭力探。義天橫截。南湖雨華。屢踞前列。鼎峙三觀兮於菟元斑。區分一乘兮尾閭自泄。海闊山遙。難追軌轍。雲暖誰尋寒谷春。晴宵又耿長空月。

漢章雲法師

魁梧厚厖。慈和安祥。聲在江湖。品目。儀表。衡台學場。空假中之列三兮。一與三之不立。修多羅如標月。兮指與月之俱忘。四處提撕。四花飛揚。未老掩光返常寂光。此其所以為栢庭之克家。雲公漢章者也。

雲谷粹長老(小師請)

閒如雲。虛如谷。歲晚一庵。湖山千簇。師資相忘。古靈何必拊背。動靜無間。茶陵空自跌足。一味卷舌冥懷。付與松風度曲。玉几如此抑揚。也是喚么作六。

芝巖禪師

和氣藹藹芝。觸著變荊棘。笑把凌霄峯信脚踏翻。直得新昌石佛額頭汗出。慈雲峯頂。機用縱橫。凌空駕虛。從其建立。高崙蒼蒼。東湖冪冪。僧繇妙筆亦難傳。絲毫不動成狼藉。咦。

照講師

口哆眉厖。坐如釘椿。戒香逆風。孤行凌霜。一新受經重其本。三主法社持其綱。此其所以發毫端毗尼藏。而樹末世精進幢者也。

南礪果法師

氣和色莊。襟度洋洋。雪殘春嶂。月午秋江。峙凌虛金碧兮增飛來小朵之奇觀。發昔人幽潛兮來典午咸和之遺芳。或見或聞。意消心降。若夫奉己淡薄。接物慈詳。不泥文字。不墮平常。此所以為北峯之克家。而於自受用三昧中。合乎性具之宗綱。

頤蒙法師

癯然容儀。軒然作為。古潛清苕。珠媚蟾輝。筌忘大部兮半點不膠名相。冥通三觀兮一毫不著玄微。石礪付衣。末流著龜。山雷山泉兮從教名[打-丁+貌]。虛空解講兮其誰知之。

山隱居士(作圓頂方袍相)

僧之形。人之英。何所作兮畦衣常披。何所說兮玉塵常擯。世情悠悠兮若秋雲之淡。胸次了了兮懸秋月之明。其稟也靈。其施也平。六窗自虛。萬象自呈。斯何人歟。豈不入山林而隱。不濯滄浪而清者耶。

樊路分為母陳安人請贊

母儀慈淑。閨範持循。善行冰雪。壽骨松椿。雍容堂上兮鳳霞儼儼。羅列堂下兮蘭玉泚泚。厚德陰儲兮留乎奕葉。和氣輯睦兮浹乎鄉鄰。[媿-囟+(色-巴+囚)]城東之作家兮付佛身於等幻。乘月上之迅機兮應日用而常親。若問其中轉身處。虛空揣出妙無痕。

自贊

是境不涉。逢緣不借。惡人隨順。喜人凌跨。撥千聖賸語為畫處山川。笑從上發機如巾結兔馬。絲糝弗容留。虛空生柄杷。只今納敗向誰。他罵不如自罵。

保福溥長老請贊

雲門普。千鈞弩。驀地一發。當陽飲羽。冤有頭兮債有主。

法喜涇長老請贊

有準繩無捉摸。開口錯商量。鐵蒺藜確確。日冷月熱。涇清渭濁。昨夜鳳巢生鸞鷲。

集福鑑長老請贊

雷轟電馳。寸毫尺釐。全機大用。放下竹篋。突出雲門顧鑑咦。

明化惟長老請贊

為無所為。益無所益。和氣如春。近傍不得。有時嶮處少機關。拶倒臨濟白拈賊。以冤報冤。其義不忒。

溢首座請贊

[毯-炎+畏][毯-炎+畏][毯-炎+崔][毯-炎+崔]。顛顛昂昂。強出人前。果見乖張。直如劈竹而人罕知其曲圓。如走丸而吾常用其方。聞說我宗甚奇特。當甚多年苕帚椿。明修棧道。暗渡陳倉。出語全無碑記。考賊不用證贓。敢濫稱花木瓜直下兒孫。真所謂米盡到糠。箇樣觜斂。非惟人惡。吾亦自惡。那堪形之丹青。懸之高堂。第一分付斷雲付與丙丁收藏。覆水自來收不得。從教四海沸如湯。

西山泳長老請贊

擡空雲蒂。補太虛縫。雖在窮相手頭。却要因人發用。等閒撞著箇冤家。活脫臨時看拈弄。

棲真身長老請贊

我無我。柰這箇。眨得眼。話已墮。翻轉面皮。放人不過。槌碎連城之壁。大肆秦人之禍。

梨洲戒長老請贊

相牽相引。自拈自弄。賺正因人。變滅胡種。業在其中不自知。九成韶集丹山鳳。

小師清默請贊

直如鈎。曲如弦。拍盲使去。罔測其然。不解深詮。強出人前。默然兮意傳。更待驢年。

小師清泰請贊

瞥喜瞥嗔。沒頭沒腦。道泰時清。生風起草。等閒相撞。黑漆竹篋劈面來。無禪可談。三寸舌頭胡亂掃。九九百百。自不知老。稱為臨濟兒孫。頑石何曾是寶。

小師清瑞請贊

萋萋蕤蕤。[(ㄌ@米)/大][(ㄌ@米)/大]結結。自把不定。人多不悅。一味從空架空。知他有何所說。養子緣迷子訣。六月炎炎飄瑞雪。

偈頌

壽平章秋壑師相

稽首毗盧法身主。三身一體圓滿覺。曼殊室利大智海。普賢清淨行願門。大慈悲父觀世音。信住行向地等妙。五十三位善知識。權實擁護天龍神。慈威加被儼在上。鑑茲贊祝日行空。癸酉仲秋之八日。定光金地產異人。自威音前秉正因。向靈山上受記荊。優鉢孕奇時一現。昴宿騰精瑞兩間。千靈嘉會當其時。君臣道合若符節。昇平規模愈持重。呼吸變故常鎮浮。身徇國難入重險。手扶日轂陞中天。遠夷縮縮憚威略。生民熙熙安衽席。嗣皇矜式尊為師。萬彙仰戴恃為命。佛法流行明盛世。持世護法端有憑。二千年後視今日。二千年前等無異。如來慧命期永續。眾生正信當不斷。整頓乾坤大力量。安樂黎庶大福德。我此伽藍鄧嶺東。釋尊舍利所鎮臨。即茲吉祥殊勝地。袞繡光儀立壽祠。穰穰緇侶方儼集。鐘鼓梵唄何所祝。萬象舌頭悉稱壽。寶塔顯為舒瑞光。昔阿育王造佛塔。其數滿八萬四千。一塔該八萬四千。八萬四千同一塔。八萬四千妙吉祥。八萬四千妙殊勝。願均吉祥與殊勝。散作壽域無邊春。

題覺心居士轉物軒

兩沼灑寒碧。一堂納寬閒。高柳逢春新翠展。寒梅霽雪清香繁。好本栽培常爛熳。四序芳馨看互換。雜華境徧剎塵中。十波羅蜜更主伴。覺心隱几隨徜徉。六用俱妙無可降。跏趺不語亦不默。篆煙一縷春晝長。釋迦老子何所見。教譚三百皆方便。就中一處最親切。轉物不為物所轉。此堂物物元無殊。隨人受用有親疎。塵塵攝入大毗盧。應笑本來物無轉亦無。

人我擔

分人分我謾多端。一串黃金鎖骨寒。善賈何曾停死貨。明明擔出與人看。

示錦屏趙高士

真游誰管客程賒。閨苑春風幾度花。若會粟中藏世界。寥陽不是玉皇家。

性空

萬有俱該等太虛。更須拈却趙州無。如今若欲知端的。舜若新添額下鬚。

絕詮

虛空講得四花飛。大地山河總發機。碧眼黃頭無處覓。是中元不動唇皮。

日本仙侍者歸國

三應聲中密意通。分明飯布裹春風。休論親切不親切。巨舶回程至海東。

道者復幹接待

旋營屋子嵌雲山。舊日靈泉氣象還。但有過門教歇去。誰云道者少機關。

日者王振齋

言口談天有振齋。五行曾不涉安排。小軒對坐似無語。幾度晴雲過斷崖。

賀大淵自資福住白雲

者邊颺下啗溪杓。鋤斧又移深處山。說與白雲門外客。相逢莫作舊時看。

病中送湛侍者之京

別我從容藥鼎邊。迢迢京路紫霞連。重提藥病相治句。却道親依已五年。

示沙彌

維衛芳騰蔓愈滋。花花葉葉轉芬披。鄮峯酷烈較些子。曇萼翻成鐵蒺藜。

示林侍者

點墨如將當已長。分明白飯糝椒薑。出門相送都無說。堂下秋花自吐香。

晦機

舌上雷轟一默間。纖塵不動鼓波瀾。拈花會上人無數。輸與頭陀一破顏。

沙彌付衣

鷲嶺將何付飲光。十成綿密轉乖張。鄮峯恁麼不恁麼。尺線單絲自短長。

吳道人求語回庵

東遊何見便還西。覓我伽陀要指迷。領取庵頭好消息。冬蔬經雨翠交畦。

小佛事

燈殿主火

識得佛去處。燈非日月明。機先忘正位。古殿綠苔生。有口如啞。有眼如盲。正好[拚-ム+去]身入火坑。

心莊主火

將心來為汝安。家產已遭籍沒。覓心了不可得。不知身在帝鄉。將錯就錯。死路活行。闍角泥牛火裏耕。

晝上座火

究明己躬。不問昏晝。捱到力盡神疲。直下死生關透。透後如何。
舜若多神暗點頭。勝熱婆羅開笑口。

宗副寺火

智不到處。作麼生宗。翻轉鐵面具。撒却筭子筒。窮則變。變則
通。南山燒火北山紅。

恭正二上座入塔

指骨云。一箇是蘇州恭上座。一箇是泉州正上座。正者聖諦不為。
恭者平欺達磨。一等有些骨肋。守住翻成死禍。拊骨云。疊疊湖山
煙翠鎖。

祖剛淨人火

以剛制柔。以柔用剛。黃梅夜半。米盡到糠。死眼忽開。本來無
物。擲下火把云。三昧現前。臭煙蓬焯。
物初和尚語錄(終)

[CBETA 贊助資訊](#)

(<https://www.cbeta.org/donation/index.php>)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
